

दिनांक 31.01.2025
समय: 18.45 बजे
आकाशवाणी जयपुर-अजमेर

प्रादेशिक समाचार

- मौजूदा विधानसभा रो बजट सत्र राज्यपाल रा अभिभाषण सागे सरू व्ह्यो-राज्यपाल कह्यो के सरकार री योजनावां रो हर तबका री जनता ने फायदो मिल्यो।
- सत्ता पख कह्यो – राज्य री मौजूदा सरकार माथे एक साल मांय विपख कोई आरोप नीं लगायो – विपक्ष सदन मांय जनता ऊं जुड़्या मुद्दा माथे चर्चा री मांग कीनी।
- संसद रो बजट सत्र सरू व्ह्यो-राष्ट्रपति द्रौपदी मुर्मू दोन्यू सदनां री भेळी मीटिंग मांय कह्यो- भारत दुनिया मांय माली, सामाजिक अर सियासी थरता री मीसाल पेश कर रह्यो है।
- लोकसभा मांय आज पेश करी ज्या आर्थिक सर्वेक्षण मांय देश रा सकल घरेलू उत्पाद-जीडीपी मांय छह दशमलव चार फीसदी री बधोतरी रो अनुमान- केन्द्रीय बजट काल पेश कर्यो जावेला।
- महाकुम्भ मांय वसंत पंचमी रे मौके व्हेवण वाळा तीजा अमृत स्नान सारू जीरो एरर व्यवस्था तैय करण रा हुकम दिया ज्या।

000

मौजूदा विधानसभा रो तीजो सत्र आज राज्यपाल हरिभाऊ बागडे रा अभिभाषण सागे सरू व्ह्यो। अभिभाषण मांय राज्यपाल प्रदेश री मौजूदा सरकार रा एक साल रा कामकाज रो ब्यौरो दीनो। वे सरकार री उपलब्धियां रो जिक्र करता थकां कह्यो के सरकारी री कोशिशें ऊं समाज रा हर तबका रो विकास व्ह्यो है। राज्यपाल कह्यो के सरकार नौजवानां, किसानां अर महिलावां रा विकास माथे खास ध्यान दे रही है। वे कह्यो के प्रदेश मांय स्वास्थ्य सेवावां ने मजबूत बणावण माथे ई राज्य सरकार रो खास ध्यान है। लारला दिना व्ह्या राइजिंग राजस्थान ग्लोबल इन्वेस्टमेंट समिट रो जिक्र करता थकां श्री बागडे कह्यो के ओ देश रा औद्योगिक अर माली विकास मांय मील रो पत्थर साबित व्हेला। वे राज्य री पैली वाळी सरकार रा काम-काज रो जिक्र करता थकां कह्यो के जल जीवन मिशन घोटाळा अर पेपर लीक रा वाक्यां ऊं राज्य रो नाम खराब व्ह्यो है। श्री बागडे कह्यो के राज्य री लारली सरकार ईआरसीपी रा काम ने अटकावण री कोशिश कीनी।

.....

राज्यपाल रा अभिभाषण रे दौरान प्रदेश कांग्रेस अध्यक्ष गोविन्द सिंह डोटासरा कह्यो के सरकार बैठकां नी करे है, ई परां राज्यपाल कह्यो के जनजातीय हितां ऊं जुड़ी बैठकां वां री जिम्मेदारी है अर वे इण ने पूरी करेला। कांग्रेस रा विधायक मुकेश भाकर रो विधानसभा ऊं निलम्बन ई आज खत्म कर दियो ज्यो। मुख्य सचेतक जोगेश्वर गर्ग इण रो प्रस्ताव रख्यो जिण ने सदन मंजूर कर लीनो। राज्यपाल रा अभिभाषण पाछे सदन मांय आज घणो काम-काज नी व्ह्यो। राज्यपाल ऊं मंजूरी सारू बिल अर तीन अध्यादेश सदन सामी पेश करी ज्या। ई पाछे विधानसभा री कार्यवाही 3 फरवरी ताई टाळ दीरीजी। विधानसभा रो बजट सत्र दो चरणां मांय चालेला। आज सरू व्ह्यो पहलो दौर सात फरवरी ने पूरो व्हेला, ज्यीं पाछे दूजो दौर 19 फरवरी ऊं सरू व्हेला। वां ई दिन राज्य रो बजट पेश कर्यो जावेला। ई पाछे खबरनवीसां सागे बातचीत करता थकां संसदीय कार्यमंत्री जोगाराम पटेल कह्यो के राज्यपाल रा अभिभाषण मांय सरकार री नीतियां अर सोच ने सदन सामी रखी ज्या। वे कह्या के राज्य री मौजूदा सरकार माथे विपख हाल ताई कोई आरोप नी लगायो है।

.....

सदन मांय विपख रा नेता टीकाराम जूली खबरनवीसा सागे बातचीत रे दौरान कह्यो के सदन मांय जनता ऊं जुड़्या मुद्दा माथे चर्चा व्हेवणी चाहिजे। वे कह्यो के सरकार री कथनी अर करणी मांय फर्क है।

राष्ट्रपति द्रौपदी मुर्मू कह्यो है के भारत दुनिया मांय माली, सामाजिक अर सियासी थरता रा मजबूत स्तम्भ रा तौर ऊं मिसान पेश कीनी है। राष्ट्रपति आज संसद भवन मांय लोकसभा अर राज्यसभा रा सदस्यां री भेळी मीटिंग मांय बोल रही ही। वे भरोसो जतायो के साल 2047 ताई देश निश्चित तौर ऊं विकसित, मजबूत, सक्षम अर समृद्ध बण र सामी आवेला। राष्ट्रपति कह्यो के सरकार देश रा विकास अर जनता रा भला सारू लगातार काम कर रही है। राष्ट्रपति देश मांय मजबूत बुनियादी ढांचो बणावण रा जतन रो जिक करता थकां कह्यो के भारत अब मेक इन इंडिया ऊं आगे **मेक फॉर द वर्ल्ड** री ओर बढ़ रह्यो है जिण ऊं नौकरी-धंधा रा मौका बध रह्या है। श्रीमती मुर्मू कह्यो के देशभर मांय तीन करोड और पिरवारों ने मकान मुहैया करावण सारू प्रधानमंत्री आवास योजना ने ओर बधावण रो फैसलो करी ज्यो।

.....

राष्ट्रपति कह्यो के सरकार स्वास्थ्य रा बेहतर सुबीता मुहैया करावण सागे ई भणाई-लिखाई अर नौकरी-धंधा रा नुवा मौका पैदा करण बाबत् मोटा पैमाना माथे काम कीनो है। वे कह्यो के सरकार महिलावां ने मजबूत बणावण सारू नुवा नजरिया सागे काम कर रही है। राष्ट्रपति कह्यो के सरकार सामाजिक न्याय अर बराबरी सारू डिजिटल टेक्नॉलाजी ने जरियो बणायो है। साइबर अपराध रा बधता मामलां माथे चिंता जताता थकां राष्ट्रपति कह्यो के सरकार साइबर धोखाधड़ी ने रोकण सारू ठोस उपाय कर रही है।

0000

देश रा **वास्तविक सकल घरेलू उत्पाद** मांय छह दशमलव चार फीसदी री बधोतरी रो अनुमान है। वित्त मंत्री निर्मला सीतारामन आज संसद मांय आज पेश करी ज्यो माली सर्वेक्षण मांय आ उम्मीद जतायी। सर्वे मांय बतायी ज्यो के घरेलू माली व्यवस्था री बुनियाद मजबूत बण्योड़ी है अर देश खेती-बाड़ी अर सेवा हलका री मदद ऊं स्थिर माली विकास रो दरसाव कीनो है।

सर्वे रे मुताबिक साखां री रिकॉर्ड उपज अर खेती-बाड़ी सारू चोखा हालात ऊं गांवाई हलका री मांग मांय सुधार निजर आयो है। सर्वे मांय जीएसटी संग्रहण मांय 11 फीसदी री बधोतरी रो अंदाजो लगायी ज्यो है। वित्त मंत्री काल संवारे 11 बज्यां लोकसभा मांय माली साल 2025-26 रो केन्द्रीय बजट पेश करेला जो वां रो लगातार आठवों बजट व्हेला।

000

प्रधानमंत्री नरेन्द्र मोदी भरोसो जतायो है के संसद रो बजट सत्र साल 2047 ताई विकसित भारत बणावण रा काम सारू खुद मांय नुवो अर जोश भरेला। संसद रा बजट सत्र री सुरुआत ऊं पैली खबरनवीसां सागे बातचीत करता थकां प्रधानमंत्री कह्यो के देश, विकसित भारत रो संकल्प पूरो करेला।

000

प्रदेश मांय सर्दी रो असर थोडो कम व्ह्यो है, हालांकि आज बीकानेर, सीकर अर जैसलमेर मांय संवारे मोड़ा ताई धुंअर रही। मौसम विभाग रे मुजब सब ऊं कम 5 दशमलव 8 डिग्री सेल्सियस तापमान सीकर जिला रा फतेहपुर मांय दर्ज करी ज्यो। करौली, दौसा, नागौर, अलवर अर माउंट आबू मांय कम-ती-कम तापमान 7 डिग्री सेल्सियस ऊं नीचे रह्यो।

मौसम महकमो दो फरवरी ताई मौसम साफ रहवण अर पारां मांय मामलू उतार-चढ़ाव रा आसार जताया है, हालांकि तीन फरवरी ऊं पश्चिमी विक्षोभ रा असर ऊं तीन अर चार फरवरी ने राज्य रा उत्तराद-ऊगणी हलका मांय कठे-कठे बिरखा री संभावना है।

000

और अब खबरां महाकुंभ ऊं-

प्रयागराज मांय चाल रह्या महाकुंभ मांय मौनी अमावस रे मौके व्ह्या वाकया रा कारणा री जांच सारू बणायी ज्यो न्यायिक आयोग आज संगम घाट रो दौरा कर र हालात रो जायजो लीनो अर कारणां री

जाणकारी लीनी। आयोग महाकुंभ री व्यवस्थावां अर प्रबंधन ऊं जुड्या अहलकारां सागे मीटिंग ई कीनी। बुधवार ने महाकुंभ रा संगम हलका मांय व्ह्या हादसा रे कारण 30 जणां री मौत व्हे गयी है अर 60 जणा ज़ख्मी व्हे ग्या। आयोग एक महीना मांय सरकार ने रपट संपेला। आगे वसंत पंचमी ने व्हेवण वाळा तीजा अमृत स्नान सारु उत्तर प्रदेश सरकार जीरो एरर व्यवस्था तैय करण रा हुकम दीना है।

.....